

孝經本義

1-8

1-8

1-8

光緒乙巳季秋

孝經本義

柏經正堂雕訖

孝經本義

讀法

一須知此孝字是堯舜以來所傳之大道全體以此立大用由此生互古今塞宇宙無一人一事所能外爲孔門論學之宗旨非匹夫效烏哺之爲泥二人之身以爲孝也

二須知此經字非六經之經乃天下大經之經天下大經卽人事也天生萬物人爲最靈卽以裁制萬物而爲之主而非人與人相接爲羣不足

以制物孝者人與人相接之始所以能羣之源也故以孝爲六合之經帝王之政治聖賢之學問皆以緯之是以孝之理爲天地閒之經非以十八章之文爲經卽本書所謂天之經也

三此書論孝與論語有子所述夫子答孟氏父子及游夏兩賢孟子良知良能守身事親之語無一不同故爲大道之淵源儒家論學之宗旨

四此書孝字是指天命之性上天之載發動人心之端言之性量無所不該故能彌綸六合綱紀



萬世爲六經之質幹爲萬變之範圍也泥定孝之一事詮解卽失其旨

五此書是爲學問達天德者抉其本源示之徑路萬物本乎天人本乎祖祖亦天也蓋推及生人之始必有不可知之祖不得不歸之天則天爲人人之大父係實實確確可據之理然天高遠無形質可接其可接者惟天所生之人物亦猶事父母者拘於父母之身以爲孝則其孝甚小無從致力必由孝而爲悌以敬愛其昆弟然後

能順其親故以學問達天德必視民爲同胞物  
皆吾與天下爲一家中國爲一人真知其理爲  
真能知天實爲其事爲實能事天故以天爲父  
而後六合以內天所生之人皆實爲吾同胞天  
下一家矣此理卽吾事父之理確有可據本源  
旣正徑路斯明默契無聲無臭之天卽在易知  
易能之孝彼各教言天有如是之曲折分明簡  
易易循乎

六然後知此書爲衛道之書中國道統開自堯舜

孔子祖述堯舜孟子曰堯舜之道孝悌而已矣  
及周之衰大道不明百家紛出諸子爭鳴而惟  
楊墨爲最鉅楊子卽老子之流墨子或謂與孔  
子同時老子知守身而不知達天墨子知達天  
而不由守身故夫子特著此書以明吾道之一  
貫天理由天而人一本之分爲萬殊者孝之繼  
以悌也人事由人而天萬殊之統於一本者悌  
之發於孝也故確守此書之說終身以爲依歸  
決無他歧之惑而陷於異端

七論語夫子與長沮桀溺等語卽是闢爲我之說

孟子拒楊墨而推恩保民是取兼愛守身正己是取爲我蓋夫子時上無民胞物與之宗子家相下尙有守身正己之畸士高人夫子懼其流於無君故欲招此等人與之共任斯道所謂爲生民立命也孟子時則鄉愿之焰熾富貴利達之念深入於人之肺腑不惟世少兼愛之墨亦並少爲我之楊故楊墨逃歸孟子均欲受之此書則發明大中至正之道而預知楊氏爲我之

說久而必窮墨氏兼愛之說必將大行於世然  
愛無差等則昧愛之所從生而始無父繼必以  
人皆爲平等而終至無君故此書名曰孝經而  
言事君事長處爲多百世後之患夫子蓋無不  
預爲見及而防之也

八此書言孝以身體髮膚不敢毀傷爲孝之始立  
身行道揚名後世爲孝之終孝爲心性之理而  
此不言者言心性則重在知而遺良能言形體  
則知能皆該其中此書漢藝文志錄於六經後

別爲一類蓋古之小學以授童蒙者語童子以理則幽渺難知不如示之以事之顯而易見也據孩提之知能指示聖帝明王之大道所謂蒙以養正聖功也

九童蒙初入學先識字習算讀小兒語弟子規等書次授以孝經而論語又後之藝文志列孝經類於論語後而其中有五經雜議爾雅小雅古今字弟子職等書弟子職爲童子所習之禮五經雜議與論語類中五經議奏十八篇均注爲

石渠論蓋宣帝時諸儒議論石渠之語也議奏似說五經之精深者故議而奏之也雜議則說五經之淺近者議奏列於論語類與孔子家語三朝記爲類而雜議列於孝經與爾雅小雅古今字爲類故知授童蒙孝經先於論語在習書算時讀幼儀諸書後也

十藝文志於孝經後又出小學類列史攬各書是童蒙識字又在讀孝經先也然此爲劉歆僞竄入其父書中非子政原本也孝經類已有爾雅

等書爲字之訓詁古今字必爲字之形聲又別  
爲小學類集講文字之書豈不爲重複然由此  
可知小學識字後卽授以孝經也



孝經

問孝經之名疑爲孔子所定今所謂五經詩書禮易春秋自秦漢以來學者尊之爲經其稱之亦第曰詩書禮易春秋不曰經也獨孔子明孝之理不別立名如春秋及禮記各篇名之類而直曰經是孝經初成孔子卽尊其書而列爲經矣而後儒不與六經並列何也曰據後儒記孔子語均謂孝經爲經似孔子獨謂此書爲經也然以經名孝之理非自尊其所爲之書卽堯舜

之道孝弟而已之義也人之所以能參天地者其經爲孝而他皆緯也蓋孝之理直上直下者也天壤之間祇此生生之理近而取之於身上而探之於天下而衍及萬世旁而橫貫四海其生生之理無一不同故聖王經緯天地其經孝也禮樂刑政皆緯也聖人發明經緯天地之理筆之於書定爲六藝則以其書明經世之理後儒遂尊爲經孝經則正六藝之經也其理精微其用宏大而事迹淺近爲孩提之良知良能人

生八歲以後卽能漸明其理而實行其事故於  
童子習書數時卽授此書而講明其理以爲蒙  
養之根本列之小學故不儕於六經特名之爲  
經者以其書發明六藝之經懼人以爲淺近而  
忽之也然則孝者握天下萬世王道之本源而  
一以貫之者也卽論語之所謂仁大學之明德  
中庸之至誠孟子之性善詩以感發於性情之  
際禮以範圍於日用之間書以推行於朝野樂  
以和同於隱微易則慮滯於一而神明變化以

會其通春秋則懼流於虛而據事直書以徵其迹爲六經之根柢而愚夫婦可知可能卽爲六經之階梯也故列之小學易所謂蒙以養正者卽養此也夫子之道一以貫之曾子指爲忠恕則夫子之六經一以貫之必爲孝經故曰堯舜之道孝弟而已矣堯舜之道卽夫子之道也

鄭康成六藝論曰孔子以六藝題目不同指意殊別恐道離散後世莫知根源故作孝經以總會之以孝經爲道之本源六藝之總會其見甚

卓非諸儒所及子說卽本於此

中庸經綸天下之大經立天下之大本鄭注大經謂六藝而指春秋也大本孝經也案大經大本中庸繫之天下則天下之大經大法春秋言之而其大本孝經示之大經大本在天下而夫子以春秋經綸之孝經立之也朱子章句經常也大經者五品之人倫大本者所性之全體也則以大經指倫常大本指心性倫常莫大乎孝而孝爲天命之良知則孝爲六經之本源漢儒

宋儒之說未嘗不同也

孝經如此精深博大童子習書算時卽授以此豈能領悟不蹈今以大學中庸授童蒙之失乎義理無從索解則強記其辭大道晦於記誦詞章蒙養失其序也聖人曾未慮及此乎曰語其理則精深博大非童蒙所能遽解語其事則倫常日用淺近切實孩提之所能知能行也由淺近之迹以指明精深之理使爲切實之事卽無詞章記誦虛浮之患若曰凡爾童蒙一生事業

卽是此事天壤閒萬事紛紜皆爲此理汝今日  
所以學者皆爲明此理從此皆以爲此事也先  
入爲主習藝之中而道寓焉未讀六經已知讀  
書所學爲何事蒙以養正卽爲聖功者此也漢  
書藝文志於五經後特出論語孝經蓋五經爲  
大學成人所講習論語孝經則爲小學童蒙所  
講習爲五經之先導也

孝經爲孔子授曾子之書注疏謂曾子之孝先  
有重名乃假因閒居爲之陳說此書是特假曾

子之名非爲曾子作也考曾子在聖門最爲年  
少少孔子四十六歲生於定公五年定公十二  
年孔子出行曾子年適八歲爲入小學之期安  
知非曾子入小學卽從夫子學夫子故著此書  
以授之也孔子周流無曾子事迹年幼不能從  
也故從陳蔡四科之中無曾子此亦可證童蒙  
入學必須先授孝經也

學字教字從學教學同聲可以互通假借可見  
上古神聖創學立教卽從孝字入手孔子自著



孝經以授曾子是上古舊法古時未立文字孔子始演爲書也



孝經本義

咸陽劉光蕘古愚著

涇陽柏惠民小餘校刊

開宗明義章第一

章爲樂章其字從音從十謂樂之一終也故詩有分章法以詩爲樂章也孝經之文未嘗用韻則仍爲講論之書非歌誦之文何以亦分章如詩也曰此後人所爲非孔子著書時卽分章也故孝經章第古今文卽不相同而後儒又各以意自爲分合則讀孝經者可不必拘拘於其章也分章卽不必拘則各章所題之名亦後人標之爲名而非孔子所定之名也然今文孝經分十八章自漢已然非若易繫詞及大學中庸分章始自宋儒也則開宗明義之標目必有所本蓋孔門所傳授卽分十八章遂

有十八目而十四博士之議論亦無不同  
蓋授童蒙一書必先告之以宗旨大義所  
在童蒙胸中先有一定向以爲必赴之程  
則此後講讀皆以發明吾心中自有之理  
吾他日必爲之事書皆易解而且易記而  
不忘孝經爲孔門訓童之書故分章標目  
先明宗旨大義爲授經童蒙之定法吾人  
不可不知故開宗明義四字又不得以開  
宗旨明義理圖揭過而不求其用意之  
所在也開宗者於各教爭鳴之時特開儒  
宗也明義者於大道晦盲之際特申大義  
也前未有而創之故曰開久不顯而彰之  
故曰明孔子之時王道不明學校大壞師  
道不立異端爭鳴其高焉者遠託黃農而  
清淨無爲逞其說於日用倫常之外其卑  
焉者近師管晏詭遇求獲馳其志於功名  
富貴之中又有墨史記稱墨翟或曰與  
翟者與吾子同時或曰在孔子後

此用同 倡爲兼愛之說以與吾儒孝弟爲  
時之說 仁之本說爭勝知天地爲大父母

而遂不父其父不母其母自詡夏制薄葬  
其親服喪三月而精於算術最工製造假  
技藝爲守圍之術強聒時君以行其教摩  
頂放踵求利天下其教信從者眾遂欲駕  
於吾儒之上而長沮桀溺接輿丈人晨門  
荷蕢六七才俊憤時嫉俗又復掉首不顧  
辟人辟世入山惟恐不深堯舜以來相傳  
之大道不幾斷於斯世乎夫世爲人世道  
卽人道吾儒肩斯大道以爲萬世之人也  
人道至全孝足以該之洞徹於無聲無臭  
之表足參造化之源充塞於不火不粒之  
邦足治生人之類故以孝明吾儒之宗見  
道之所以參於天者以孝參之而操之  
有其本也道之充滿於世者以孝充之而  
推之有其序也故謂孝爲至德人之所同  
得於天者故曰至也此開宗也謂孝爲要

道人之所同由於於世者故曰要也此明義也開宗明義之旨其在斯乎其在斯乎先儒標斯章之旨或別有在而今日爲吾黨講明此經則必以斯爲宗義而後能明此經而於吾聖人之道或能存一二於千百也

### 仲尼居曾子侍

問孝經既爲孔子授曾子之書必是孔子所自作何以仲尼居曾子侍句與書中子曰等類又似門人所記曰孝經爲夫子授曾子之書此無可疑必謂出自夫子手編託爲別有承受而記之者則拘矣朱子以爲夫子與曾子問答而曾

氏之門人記之則以稱曾子爲子也然文氣又與論語不同與戴氏禮記中仲尼閒居等篇爲

一色筆墨此經當出於七十子之後詞義精粹

出於仲尼閒居等篇之上可與大學中庸並峙

以始於事親中於事君終於立身三句爲此三

篇注腳確切不移孝經言事親道之始大學言

平天下道之中中庸言仲尼德配天地道之終

也爲童蒙指明大道使終身有所依據而行莫

切近於孝故疑此經決出於孔子而以訓童蒙

孝經本義  
三  
故特淺近其詞歟

子曰先王有至德要道以順天下民用和睦上下無怨汝知之乎曾子避席曰參不敏何足以知之

此書名爲孝經是於道之全體大用中指出一箇事來以貫全體大用不是沾沾就孝經上推衍其理也猶如有一堆絲於其中分出作經的則其餘作緯皆一一就緒而無一絲之不理故殺作書之由是夫子呼參而告之不是出於曾子之問夫子呼參而告與一貫之傳正同然則



孝者一也經者貫也先王有至德要道以順天下民用和睦上下無怨汝知之乎猶言自古至今聖王經理天下有一箇理卽在天下之人心

中聖王取來復順而布之天下而天下之人皆如自獲其心無不本此理以自制其行則各相安就理而天下億萬之眾遂如一身一家以成大同之治此理卽在人人心中卽人人能知能行然欲行之必先知之詢曾子之知否使曾子惕然切己以自思也故此處先王有至德要

道卽論語之吾道以順天下卽論語之貫之民  
用和睦上下無怨卽貫之而一無窒礙毫無遺  
滿汝知之乎卽是呼參乎二字之故論語說出  
一是說出所以貫矣曾子恍然於所謂一卽可  
相喻於無言忠恕者在心之孝弟故曾子唯而  
夫子卽出也此處未說出所以順之爲何物事  
曰至德曰要道不知如何高深廣遠曾子方震  
駭驚歎之不暇而何能遽知故逡巡避席而謝  
不敏也

孝弟者治事之忠恕也道以心言則精微深奧  
非初學所能遽知就事上指點則淺近切實人  
人能曉呼曾子而授以孝經於事物紛紜之中  
指出一原之理欲曾子於日用上自悟性天先  
博後約聖人教人定法

至德要道卽大學之至善曰至德曰要道是分  
明指爲斯世之大經矣呼曾子而授以孝經是  
教曾子之知止求一貫之法也呼曾子而告以  
一貫是驗曾子之得止得者行之效也如與人

說路然與未行其路者言必曰某處有某物與  
曾行其路者言則曰汝來遇某物否故授孝經  
是教曾子之始而授一貫是教曾子之終也

至德是指人心之德要道是謂所行之道惟德  
爲人人所同得道爲人人所共由故以施之天  
下爲順天下而非聖王有所作爲於其閒也民  
用和睦上下無怨孝則無悖逆爭鬪之事也故  
此舉聖賢萬物一體之量以授曾子也

孝弟是學者所爲之事忠恕是所存之心仁義是

所循之理先王有至德要道以順天下民用和睦上下無怨卽以愛敬之仁義達之天下意孟子是由心說到事夫子是由事求其心一推一心於天下一納天下於一心也其說正無不同古之學者患逐物而不知所止大道之統自堯舜開之以至周公皆身與天下之事其造士必不遺棄天下之物而枯守其身以匹夫之孝供二人之養而遂無餘事也今之學者患知止而不求備物後世家天下以天下四海之量爲天

子一人一家之事士庶人不敢以自擬九五飛龍之占宋之大臣且不敢當況士庶敢以天下自任乎故言孝僅循世俗之見泥父母之身以爲孝養其口體而不及其他子游子夏蓋皆不免於此夫子皆不許爲孝而與曾子論孝開口卽曰先王曰天下曰民曰上下泥父母之身以爲孝蓋夫子時已有此端故與曾子言孝力矯之也

不泥父母之身以爲孝此言出聞者必大譁以

爲邪說亂道試取五經論孟語證之方知吾言之確蓋此等語爲聖門微言漢時猶未大著故其風俗多以廬墓持服爲孝而於立身行道忽略不講後世相傳愈遠而愈失其真俗傳二十四孝史策所稱皆不出服勞奉養之外惟張子西銘以事親言事天則能事天方能事親不至能事天不足以滿養志之量故程子謂西銘語自孟子後未有見及此者以自漢以來儒者於孝之理未盡瑩也

夫子志在春秋行在孝經春秋借亂世之事以寓王法是以天下一家中國一人四海大同之量期之萬世也行則行其所志夫子之所謂孝分明是父天母地之謂春秋之文游夏不能贊一辭觀論語夫子不以游夏爲孝則於孝之理未瑩卽於春秋之文不能有所窺也

事親養志必以志在春秋之志爲志方爲能養親之志故古今孝有三明其理則爲可始於事親曾子是也通其變則爲達中於事君武王周



公是也盡其道則爲大終於立身大舜是也事  
親知養志之孝爲學必能達天德爲政必能行  
王道

子曰夫孝德之本也教之所由生也復坐吾語汝

孝經是以孝語曾子乃不從孝說入而從先王  
以至德要道能順天下和睦無怨說起使曾子  
求所以然及謝不敏乃始爲說出孝字曰夫孝  
云云是從千彙萬狀之中紛紜不可理者求一  
能理之術曾子反覆思維不能得夫子乃始爲

指出是何等鄭重而吾輩入學卽得聞此道理  
是何等便宜乃不用心體貼託詞讀書不能爲  
兵農工商之業則旣惰其四肢不顧父母之養  
已犯世之所爲不孝矣而又縱欲自私辱父母  
以危父母求爲鄉里之善人且不可得而可云  
孝而曰至德要道爲德之本而可以教人乎故  
欲讀孝經先求自拔於流俗污世凡世所謂不  
孝者皆自問無愧卽舜所謂我竭力耕田供爲  
子職而已也不敢自足進求夫子之所謂至德

要道者於其始終條理一一考察何以體之身  
何以施之家何以推之國何以達之天下此中  
曲折等級直不止萬端一一想得明白乃恍然  
於孝之所以能爲德之本教之所由生從此方  
知我等在世上應爲之第一事世上億萬眾決  
不能違之第一理此後讀書窮理應事接物皆  
確然如有一物在吾心目中爲吾生出處語默  
窮通利達之本而吾生行事千變萬化不能離  
其宗此夫子以孝授曾子之本意而卽作孝經

孝經本義  
卷之七  
之本意也

德之本就自己行道有得言惟其爲本所以爲至德教之所由生則就德之及人言德字古訓原謂內得於己外得於人故德字卽能統道字然以至德要道發曾子之問曾子請之乃以教字易道字是道者吾儒與天下相見之道也與天下相見以道必須以教而不可專恃政刑提醒人心固有之良而與之以節文裁其過中失正以輔翼其不及使天下之民不識不知自範

於大中至正之途而忘帝王之設法以教我爲  
禮以齊我所謂道之以德以人心固有之德道  
之也齊之以禮以人生應爲之禮齊之也故曰  
爲政以德如北辰居其所而眾星共之朱子釋  
爲無爲而天下歸之人人固有之德人人共由  
之禮教之而非道之齊之故王者若無爲而民  
有皞皞之象亦不知其有爲之者也自秦以後  
有政刑而無教則卽無道無道卽其統一天下  
爲不得其要統一天下者舍大道之要而不知

有宜儒生講孝其言事親僅及形氣之粗而於  
志意之精者毫不推求也

孔子從順天下民和睦無怨說起而此突說到  
孝是從天下說到學者身上卽吾所謂學者爲  
學當下須以萬物爲一體也能使天地萬物與  
我一體不從孝上推闡則浮泛不切必流於莊  
列之荒唐恣肆而終循於空虛矣

夫孝孝字指孩提之愛敬言愛敬是德知愛敬  
是明德卽天命之性也德是上文至德先王行

之德充於四海故曰至此爲至德指出下手處  
故推求其本而歸之孝由孝以成至德其由此  
達彼之迹卽爲要道孝爲天命之性德卽率性  
之道也教是自古至今聖王治天下之典章制  
度禮樂政刑孔子所定六經內所言者皆是聖  
王治天下不過使人人各遂其生生之理無教  
則互相爭奪以至相殘殺而天下亂矣教所由  
生卽修此孝道以順天下也

人人皆知此愛敬能此愛敬卽不犯上作亂也

卽是和睦無怨孝弟爲仁民之本也聖王以至德要道順天下卽是以愛敬之良教天下使人人相愛敬而不相慢怨故曰教之所由生堯舜禹湯文武周公治天下之大經大法皆由孝而生卽是教是時教統於君孔子以匹夫承其道統不能不以教自任得位而達此德於天下則曰道以治言也不得位而傳此道於萬世則曰教以學言也

孔子爲千古教宗而異端亦於此紛出孔子之



教生於孝是從生人之源做起有人方有世界  
故孔子教爲人道其六經所言之天皆生人之  
天也他教則循於鬼爲鬼道其所言之天則尙  
鬼之天也

身體髮膚受之父母不敢毀傷孝之始也立身行  
道揚名於後世以顯父母孝之終也

孝爲德之本教之所由生所以順天下使和睦  
無怨者乃以不敢毀傷髮膚身體爲始立身行  
道揚名於後世爲終語若與上不相蒙者不知

此正吾儒學術之純也孝爲人生固有之良知  
然恃此虛靈之知而不實見諸行事則高語性  
天猖狂恣肆脫略形骸蔑棄倫常下焉者如聞  
親喪而飲酒食肉博弈自若上焉者如異教之  
徒外視形骸以天地爲父母不拜父母而反坐  
受父母之拜則皆以身體髮膚爲氣質之粗欲  
毀棄之以獨全靈性之說爲之也夫無此身體  
靈性於何而存不得不以天堂地獄繼其後矣  
舉世之人皆登天堂則世無人無人卽無世道

乾坤毀而人理息世閒何貴有此學術夫人之  
生也氣以成形而理主於其中以爲性其曰靈  
者以能靈此形體也以理馭氣質而此不慮之  
良知良能皆由此氣質而發氣質不奉理而行  
始有惡焉而氣質始爲性之累淺儒懼其累也  
遂欲遺棄之以孤保其靈性而所謂靈性者且  
無與於己身何有倫類民物人生無日不與民  
物相接不能滅絕離棄不得不出而強與周旋  
其說遂自相牴牾悟墨氏之徒是也墨氏倡爲兼

愛之說而獨不愛其身求利天下可以摩頂放踵非以人之貴者爲性靈而以血肉之軀爲外物哉然試問彼之兼愛者愛其人之靈性乎亦仍愛此血肉之軀使之飽食煖衣安居樂業以相親相愛而不相爭奪殘殺也人之靈性彼何從愛若仍愛此血肉之軀則於己何以甘爲毀傷而於人則愛之也此其愛果反身而誠乎其薄葬之說亦由此而生蓋以親之靈魂旣離所餘血肉之軀直與野土無異故忍於薄葬而不

知其非也能忍於親之血肉其於民之血肉又何所不忍戰國以來之殺運原野厭人肉坑谷流人血皆此以氣質爲惡有以窒其惻怛慈愛之原以至於斯也故孟子論事親在能守身而養親又重養志而不貴養口體真知孔門之所謂孝矣

身體髮膚受之父母父母授之形父母卽授之以則焉則者何五官百骸各有天則循而行之以立其身者是也吾受天地之氣以爲形卽稟

天地之理以爲性所謂天生蒸民有物有則也  
然必由父母受之而我始有之天不能徑授吾  
形卽不能徑授吾性形質義理兩者相依而不  
相離離之卽爲毀傷而形質爲不全矣人之靈  
性卽形質而具天由父母以與我我可不由父  
母以達天乎然則世以氣質之性爲惡者皆不  
知身體髮膚受之父母而敢於毀傷者也  
身體髮膚受之父母不敢毀傷孟子之所謂不  
失其身也立身行道揚名於後世以顯父母孟

子之所謂養志也志能永身身不能永志氣久必散理則終古不亡也

人卽不孝何故自殘毀身體且凡世俗不孝之人皆知自愛身體而不顧父母之養者所謂惰其四肢好貨財私妻子縱耳目之欲博奕好飲酒者皆是此人心惟知自私其身何至毀傷不知夫子之所謂毀傷其淺卽指此縱欲偷惰自私其身與禽獸何異至於身陷刑戮猶後一層則好勇鬪狠者是也若佛氏焚毀頂指以奉

佛此爲更深一層不肖者囿於形體而昧其性  
賢智又高視性命而遺棄形體夫子以孝爲大  
道之經爲教之宗旨正爲此等人設法所謂精  
粗一貫智愚賢否皆可企及而無流弊也

身體髮膚受之父母不敢毀傷不獨一己之身  
也以天地萬物爲一體則億兆之民吾身體也  
億兆之物吾髮膚也一身之痛癢息息與民物  
相通盡其性以盡人物之性故始於事親天命  
之性也中於事君率性之道也終於立身修道



之教也

口體外也志內也養口體不知養志泥於形迹之粗而忘其精有外而無內世俗之孝也養志而毀傷身體遁於性命之虛而昧其實重內而輕外賢知之過異端之孝也故合內外之道爲

孔子時中之道

夫孝如於事親中於事君終於立身

蓋夫孝是從人心一念說起故曰道之本教之所由生其一念卽孩提之愛敬知能也此夫孝

是舉至德要道全量說故分出始中終來爲全  
書提綱

始中終是就孝道上說不是就人身上說孝就  
像一條大路事親就是起初開步的地方中於  
事君則走到中間終於立身則是走到盡處卽  
是德澤及於天下萬世而夫子則曰立身若僅  
僅能完全父母所生之身者蓋雖功業如堯舜  
道德如孔孟皆是父母生我時我身自有之理  
卽我身應爲之事孟子所謂萬物皆備於身也

必處置萬物使之各得其所方算立身方算孝  
之終故身體髮膚受之父母不敢毀傷身體髮  
膚與天下萬世之人痛癢相關我無以安全之  
卽痛癢在吾身卽是毀傷卽失身不能立身而  
孝道未終孟子故謂失其身者不能事親凡事  
有始無終皆不得謂爲能行此事也

自古至今皆以孝爲事親之專名此特鄭重言  
孝而曰始於事親若事親僅爲孝之起手一節  
者蓋孔子作此書之旨在經天緯地實求天下

萬世之眾所以能相安以生者在此人與人相接之仁心而此仁心人人皆有其感發最真切莫先於親六經言治天下皆是成此仁心故論語發明六經之旨言仁處最多而仁字首見則曰孝弟也者其爲仁之本卽此夫孝始於事親之旨也然則孝必以天下萬世爲量乃爲聖門所傳之孝乃爲儒者之學不親親而仁民愛物情泛而不真其道無始絕民物而守事親德拘而不大其道無終近人謂中國之儒皆楊老之

學觀自漢以後世所稱之孝子皆拘於事親則其言信矣

始於事親少年爲學之時無世道之責養此仁心之端也中於事君長而經營四方達此仁心於天下也終於立身德成名立爲千古不朽之人中庸所謂配天也方完得父母全而生之子全而歸之兩全字

孝必從弟上做孝既不在養口體而在遂父母愛子孫之志則善處兄弟教養子弟皆是孝由

父母而祖而高曾而始祖以至於天我之盡孝處均不能接天與祖宗之身所能接者天與祖宗所生之人善與人處卽是善事天祖矣故中於事君亦吾性分固有之理職分當爲之事古謂移孝作忠非移吾之盡於父母者以施之君也吾孝由父母而高曾始祖以至於天吾所由以爲孝之弟必由一家而國而天下而萬世事君仍是弟道奉君以安四海之人卽是奉宗子以安一族之人也故橫渠謂大君爲宗子其說

爲的

終於立身卽孟子所謂爲人爲子也謂完其萬物皆備之身無忝所生也

此三句總括人一生之孝下數章乃就天下人之職分言之見職分不同孝卽不同而其由始至終之理則一也

始於事親三句總束至德要道卽以提下天子以至庶人見此理貴賤上下皆同孝所以能順天下也

此章末引詩與上文義不甚貫記黃石齋考定  
孝經以此引詩爲天子章之首念祖卽尊祖配  
天之孝尊祖配天則天下億兆之眾皆此兄弟  
而此心不能自恕此責不能他謝矣以此引詩  
爲天子章之首於文義爲順

天子章第二

大雅云無念爾祖聿脩厥德子曰愛親者不敢惡於  
人敬親者不敢慢於人愛敬盡於事親而德教加  
於百姓刑於四海蓋天子之孝也



詩言念祖念卽是本心發動處本心發動知道  
父母不能不愛不能不敬由父母之心推到父  
母之愛敬父母則念及祖矣由祖而高曾以及  
始祖更上至不可知之祖則爲天我皆不能不  
愛敬不愛敬天祖卽是不愛敬父母然此高曾  
始祖及天其形聲不可接我從何處用愛敬則  
有我之身在我身是天及高曾祖父母相傳之  
身愛敬此身使無賤辱之行卽是念祖而愛敬  
之不賤辱爾祖所謂修德也故詩云念祖者愛

敬父母之念也念及祖必愛敬及祖尊祖配天  
方盡愛敬之量詩云脩德者充此愛敬之量也  
念及天祖修德必及天下夫天下之人物其相  
繼續而生生無窮者人終爲人物終爲物則是  
天有一人種之祖爲天下億兆人所同宗而非  
物之所得與故孝子愛敬親者雖有曲成萬物  
之責而莫急於待人物僅與吾同天人則與吾  
同種之天卽以人性與我之天後文仁人爲能  
享天孝子爲能享帝卽以此分橫渠張子所以

謂民爲吾同胞也故盡吾愛敬天祖之念莫急於愛敬吾身不使有一毫慢惡之行卽是愛敬天下之人不敢使有慢惡吾身之心方爲盡吾愛敬事親之心吾盡愛敬之心吾之德修而成矣彼百姓亦有是心卽能修是德身被吾愛敬之德卽是吾教已加其身四海之人皆同此愛敬之德非爲四海之儀型乎無念爾祖聿修厥德詩言文王之德也文王雖未爲天子而天下之人心歸之則與爲天子無異念祖果及天則

愛敬必及天下故此詩爲言天子之孝而以德  
言則達天德之聖人皆是也故周公以美文王  
而孔子取之非以文王之子孫有天下卽可謂  
文王爲天子也此天子是以德言非以位言故  
言愛敬之理而不及其位之尊崇愛敬父母必  
要由高曾推到天方爲盡孝之量以愛敬父母  
者愛敬天以子道事天非天之子而何天以氣  
生人之身以理命人之性帝王與庶人本非不  
同豈帝王獨爲天之子而庶人之祖爲別有一

天乎故以子道事天庶人與帝王同特惟帝王  
眞能愛盡天下之人敬盡天下之人故惟天子  
能實充滿孝量下此則心存其理而已理之極  
者事不能外孔子垂教萬世人心歸之當時尊  
爲素王萬世仰爲師表非天之子而何西人謂  
耶穌爲上帝子亦是此意

楊雙山爲知本提綱以事上帝爲宗旨謂人有  
四統性理統於天行事統於君身體統於親學  
問統於師又謂人人皆當事天旣當事天卽祭

天不爲過特祭天不得用天子之儀文而修一  
拜之誠此說甚通中國泥於天子庶人之分謂  
天子祭天地庶人祭之卽爲僭越而道家之玉  
皇旣遍於寰中近日天主教又人人得藉耶穌  
以拜天以駕於吾儒教之上謂吾孔子爲人不  
能統天下之人豈知吾孔子以人人之父母推  
到天正是以人人之天統人人人人統於天卽  
統吾孔子之教吾孔子以事天之路徑垂示萬  
世也以愛敬父母之心事天則近取卽是操之

有其本也以愛敬父母之心而敬兄敬長敬君則由家而國而天下推之有其序也此爲今日急務講吾儒之學者必須講到此方爲見道透徹

諸侯章第三

甫刑云一人有慶兆民賴之在上不驕高而不危制節謹度滿而不溢高而不危所以長守貴也滿而不溢所以長守富也富貴不離其身然後能保其社稷而和其民人蓋諸侯之孝也

言諸侯之孝並不言及父母一字而特曰富貴不離其身然後能保其社稷而和其人民社稷人民皆傳之先君受命先王對社稷民人如帝天父母常臨於上故不敢貴而驕富而溢是心目中常有父母也心目中常有父母乃爲養志非養口體

前以大雅引起天子之孝此以甫刑引起諸侯之孝此下及庶人章皆同

以祿位言富貴之極莫如天子而上章不言富



貴於此章言之者夫子之所謂天子謂事父如  
天之人卽爲天之子以德言非以位言也封建  
之世天子一位蓋懸於虛德爲天下所歸往卽  
爲王者禹湯文武是也政令不及天下朝覲訟  
獄謳歌不歸之卽爲無王者夏自啓及少康以  
後殷自太甲及六七賢君以後周自成康及宣  
王中興後其有國與諸侯無異故紂在文王可  
以受命春秋之末孔子可稱素王戰國之時周  
尙未亡六七國皆稱王孟子以王天下說齊梁

則周與七國之王皆非有天下之天子故曰不  
仁而得國者有之矣不仁而得天下者未之有  
也如是則堯舜誠不能以天下與人而湯武非  
以天下爲富貴而兵爭故天子之位不可以弋  
取而天下不可以力征經營也充吾愛敬之量  
而已矣

若諸侯則土地人民受之先王傳之先君當世  
守之吾不能守近失先君之業遠棄先王之命  
不孝甚矣不能守者在上位而驕也無君國子

民之德而位居一國人之上此最易驕也驕則危矣擅一國之賦稅而無節度以爲之制則滿而溢矣高而危滿而溢眾畔親離求爲匹夫而不得社稷不保而民人皆去一身之貧賤不足惜而斬絕先人之祀此其罪不上通於天哉夫驕奢以至六國覆宗絕祀其端則自不敬始富貴而無所敬畏則位不期驕而驕祿不期侈而溢不驕不溢則敬身以敬親不敢慢於人之孝也保社稷和人民卽保其國也孟子曰樂天者

保天下畏天者保其國天子諸侯氣象之分其  
源皆在於孝

一人有慶兆民賴之不驕不溢保其社稷卽福  
慶也君能節儉境內殷富兆民賴之者此也說  
者謂天子稱予一人左氏稱天子曰兆民故各  
本謂此爲贊天子之孝然曰有慶曰賴之語意  
與天子章不倫以爲此章之首則無一不合湯  
未有天下卽自稱予一人秦誓稱其大臣爲一  
人而甫刑此語又穆王告諸侯使敬慎用刑一

國之中一人有恤刑之心一國之民皆蒙其福  
夫子借以證諸侯之孝詞意亦合一人兆民之  
稱不必拘以天子也而以小旻之詩引起卿大  
夫之孝烝民之詩引起士之孝小宛之詩引起  
庶人之孝又無一不合故今悉從黃氏所定以  
引詩書爲各章之首五孝悉本古訓非夫子之  
私言也

五孝以引詩書起三才聖治等章又以引詩書  
結行文之變化不滯也

上古國之所以爲國與今鄉閭之社會同今日鄉閭數村聯爲一社祀一神此卽古以神道設教所以萃人心而能立國也上古無舟車國必甚小不過今之數村其所祀之神必是開此一方風氣之人其人必皆一姓之子孫故社稷而爲其祖宗迨後風氣日開有舟車以相通則社必相聯而日大而一社之人不能皆一姓之子孫不能不擇賢以君之於是君道立焉詩所謂君之宗之是也旣易大宗族之法而爲君以治

民則始之祭其祖者不能不易而祭地人生於其地皆其地養之故祭社稷社祭地稷是地方之功用社如天子園邱之祭天稷如明堂之祭上帝也以天子以祖配天宗配上帝之義推之諸侯有國其社稷之祀亦宜各以祖宗配之故諸侯以能保社稷和人民爲孝故國滅則遷其社遷其社者變易其所配之人士神穀神不能易也天如父地如母天動而地靜天下之人同戴一天而所賴以養之地必其所生之方故同

居天下地上而國各有社此正如一父之子而  
各母其母也然則天子者善事父之宗子也諸  
侯者善事母之宗子也滕謂魯爲宗國一母之  
子幼者宗其兄也魯三  
家孟氏爲長不以孟叔爲宗而以季爲宗庶者宗其嫡也君道統於宗道則  
治天下之道統於孝乃其自然之理非聖人以  
意爲之也故天下可一家中國可一人生民之  
初理原如是也

卿大夫章第四

詩云戰戰兢兢如臨深淵如履薄冰非先王之法



服不敢服非先王之法言不敢道非先王之德行不敢行是故非法不言非道不行口無擇言身無擇行言滿天下無口過行滿天下無怨惡三者備矣然後能守其宗廟蓋卿大夫之孝也

天子之孝以天下爲量以德言人人可勉而能也諸侯之孝以一國爲量以位言則爲有國者言之也故天子章言愛敬不言富貴國可守天下不可守也以富貴言則有限制故社稷民人皆曰其其位限之非孝子量盡於一國也至卿

大夫則無世守之責宗廟自己身而始有蓋三代以來已無世卿之例故夫子言孝又推其理而至於言滿天下行滿天下也

服當作事字解不專指衣服關雎箋曰服事也謂一生所爲之事言行其大端也故後第說言行更不一及服言行卽其服也凡事皆法先王故言皆法言行皆德行言行無可擇故傳之天下而無過怨惡不及其身卽天子章不慢惡於人之效以德言故卿大夫之孝與天子無二理

也然則有德由士庶起爲卿大夫與有德而天下人歸往之則爲受命之王者正爲一例知三代上有繼世之諸侯無繼世之天子也

卿大夫章三不敢與天子章兩不敢同所謂先

王卽是天子孔子所承道統之堯舜禹湯文武周公是也天子之不敢生於愛敬其親之心奉天以立法也卿大夫則守先王之法者也心先王之心而奉其法戰兢恐其墜陷雖繼世之諸侯不必皆賢而賢卿大夫輔翼之能如周公之

於成王謂唐虞三代之治至今存可也春秋之末權在卿大夫自戰國以後先王治天下之迹掃地無餘卿大夫爲之也

士章第五

詩云夙夜匪懈以事一人資於事父以事母而愛同資於事父以事君而敬同故母取其愛而君取其敬兼之者父也故以孝事君則忠以敬事長則順忠順不失以事其上然後能保其祿位而守其祭祀蓋士之孝也

問卿大夫與士雖分尊卑然皆臣也何以述卿  
大夫之孝則曰法先王至士則曰資於事父以  
事君然則卿大夫能法先王士不能法先王乎  
曰卿大夫已受祿於國則當盡臣道以責難陳  
善爲義故曰法先王法先王則不阿意曲從以  
爲恭敬其君也若士則離於庶人之中而學治  
民之事故從治民之源頭說起見事君爲吾生  
固有之義不仕卽無義也

古之卿大夫皆以邑爲祿士祿則如今之廉俸

受祿於國而無封邑位卑祿薄漢之掾史唐之  
幕職其分在官民之間孟子所謂在官者是也  
故說文訓士爲事而仕爲學蓋自唐虞以至春  
秋學皆統於官凡成童後不爲農工商賈之業  
卽入官府治事以祿代耕無今日專以誦讀爲  
學之事此章所言之士卽指此介在官民之間  
出乎庶人而爲士始有治人之責也故聖人言  
孝敬可爲忠順之理治已必須治人孝弟爲爲  
仁之本至此始見治人之非馳於外也

夙夜匪懈以事一人舍己之親以事人後世迂  
儒卽疑之不知由家而國一國不安吾家亦不  
能安故事父之愛敬卽是治天下國家之本源  
吾能敬親方能和吾兄弟而家齊故能敬君方  
能和睦一國之人而國治也吾父不能獨生吾  
須母養之我不能不以愛父者愛母矣父母生  
我養我國亂不治卽不能生我養我故父母生  
之而君治之不能不以愛父者敬君矣獸知母  
而不知有父禽知父母而不知祖野人則知有

祖宗而不知有君吾既爲士豈可不知忠順之  
與孝敬原爲一理而效野人之爲哉不知君卽  
去不知有祖宗者無幾矣夙夜匪懈以事一人  
正所以廣吾事父母之心也況保祿位守祭祀  
忠順君上卽以愛敬吾父母也豈可沾沾養父  
母之口體而不以顯揚爲孝哉

夙夜匪懈以事一人一人卽吾父也母取其愛  
君取其敬皆分事父之道以事之故功業塞天  
地道德冠古今非有加於孝之外也孝之本量



如是也

事母事君已非一人矣然皆資之事父吾人一生所事之事皆事父之事也故曰夙夜匪懈以事一人此章之一人可借指父諸侯章之一人可決其非指天子矣

庶人章第六

詩云夙興夜寐無忝爾所生用天之道分地之利謹身節用以養父母此庶人之孝也故自天子至於庶人孝無終始而患不及者未之有也

用天之道分地之利註以爲用天四時之道分地五土之利四時曰道曰用者農事以時爲重失其時則勞而無功普天下皆然故曰道曰用也五土曰利曰分者五方之土宜不同各隨其所居之地相其土之所宜而樹藝焉故曰利曰分也庶人不及工商者工近於士商之所轉運者皆出於農人生衣食以農爲本庶人中亦惟農爲多也

能謹身其用自節謹身卽今鄉間勤儉治生業

之民聖王治天下能使人人勤儉自治生業天下卽太平矣故大學平天下章多言理財孟子言制民恆產必及庠序之教民有教化則能勤能儉不惰四肢不縱耳目之欲不博奕好飲酒不好勇鬪狠自然謹身自是節用王者能爲天下理財便是謹庠序之教教之以謹身節用以養父母便是愛敬吾親使人人各愛敬其親故自天子以至庶人其孝只是一理一事

人之爲善未有不需財者但立念在財上計較

便入於好貨財私妻子一流終且不顧父母之  
養故聖人立論從謹身說入而孟子論事親亦  
曰守身則非斤斤計較財用而語無流弊矣

天子至士章言事親言事父母此章乃言養父  
母可見由士以上沾沾養父母之身皆不得爲  
孝庶人者受治於人勞力以養人者也勞力以  
養人必先養已之父母若天子以下及於士則  
皆食於人勞心以治人者而不上體父母之心  
以自治其事可謂能勞心乎故事字卽繼志述

事之事孟子所謂不失其身而能事親者也養則孔子所謂今之孝者是謂能養曾子不敢自謂孝而直居於養之養孟子所謂養口體者是也勞力受治於人之人多勞心以治人之人少聖人分孝爲五言養者一聖人豈輕養哉勞心者第食於人而不能治人人不治庶人不能勞力以養其父母諸侯卿大夫士之社稷人民宗廟祿位祭祀皆不能保則皆不能養父母矣故孝經之作爲萬世開太平必從身體髮膚不敢

毀傷說起身體髮膚不敢毀傷養口體之源也  
養父母之身故及財用養父母之志則曰愛敬  
天子士章言事言愛敬諸侯卿大夫不言事與  
愛敬者事之出於身者爲言行及於人者爲民  
人理皆盡於愛敬天子章充其量士章決其源  
諸侯卿大夫在天子與士之間卽以天子與士  
括之夫孔子時繼世以有天下也久矣天子之  
元子亦士也諸侯卿大夫之分蓋猶爲世俗言  
之也

五孝皆以詩引起天子章之念祖嚴父配天之義也養父母之志至於父天母地則天下事皆事親之事也諸侯章之有慶長保富貴之謂也分國而治各私其國有人子親愛其母之義焉親愛之必欲其富貴則治一國之事亦事親之事也戰戰兢兢臨深履薄曾子守身之學也卿大夫不必分土而治苟能敬守吾身焉無入而不自得矣無口過怨惡其實效也注疏以言行滿天下謂爲指接對賓客將命他邦要不必拘

卿大夫爲世守之士則天下之大皆吾學之量之所必及也夙夜匪懈以事一人事卽事父事母事君之事由事父而事君自士始章內所事已三人矣而曰一人者事皆資之父則事母事君亦皆事父也然則事祖事天事天子亦皆事父也事之者以盡吾愛敬之理其量必無一人之不愛不敬而後爲能愛敬其父故卽士當事君之始而爲正其本清其源也

大學孝經皆以天下爲量大學學治之規模孝



經經世之本源也大學曰自天子以至於庶人  
一是皆以修身爲本以出治之本言之也此章  
曰自天子至於庶人孝無終始而患不及者未  
之有也以爲治之道言之也出治以身天下之  
本在國國之本在家家之本在身故曰修身爲  
本也渾言之曰孝析言之則曰愛敬愛仁德也  
敬禮文也修身以至治天下不過盡此愛敬之  
心而已愛敬爲人之良知良能何人不能知不  
能行故曰孝無終始而患不及者未之有也

修愛敬之事於身孝之始也庶人章是也推能  
愛敬之理於天下孝之終也天子章是也孝無  
終始而患不及者未之有事在身理在心皆吾  
身自有而自能之不待外求也

庶人章始於事親也士卿大夫諸侯章中於事  
君也天子章終於立身也不能事親不可以爲  
子不能事君不可以爲人若立身則踐形盡性  
之謂盡人以合天乃爲能立身也

五孝該盡天下之人以孝之大小分非以位分

也庶人責在一身故謹身節用卽是孝勢不能及人也士則學治人矣能事人乃能治人故以資父之理言之卿大夫則實事君治民矣識不周於天下不能定一國之治情不通於天下不能奏一國之安故以言行滿天下言之諸侯章爲生而富貴言之封建之敝雖極然不能驟去也故夫子修春秋惡世卿而於諸侯則褒貶並用焉知盡去諸侯則生民之禍極烈欲以道挽之而不忍見也不惟是也卽封建易而郡縣天

下仍有生而富貴者故長守富貴之學亦人生  
不可廢之理也天子則達愛敬於天下之人也  
實爲其事則爲有位之王者能修其道亦爲有  
德之聖人此爲曾子言傳之後世以爲學術則  
以德言之意爲多純王之治不能見於上純王  
之學不可不存於下也故視天所生之民如同  
胞卽以天爲父而爲天之子故嚴父配天之義  
人人與有責也

朱子以仲尼居至此爲經而去其中閒五引詩

及天子章子曰字合爲經文一章以下分爲十  
四傳其見精卓惟多易古本次第則自成爲朱  
子之孝經經傳矣今悉遵注疏本而注其分章  
於下

三才章第七

曾子曰甚哉孝之大也子曰夫孝天之經也地之  
義也民之行也天地之經而民是則之則天之明  
因地之利以順天下是以其教不肅而成其政不  
嚴而治先王見教之可以化民也是故先之以博

愛而民莫遺其親陳之於德義而民興行先之以  
敬讓而民不爭道之以禮樂而民和睦示之以好  
惡而民知禁詩云赫赫師尹民具爾瞻

曾子聞夫子之言歎孝之大者曾子平日亦以  
孝爲人子事親之庸行不以爲王道本源也故  
夫子特以孝之本量言之夫子語曾子以孝從  
至德要道順天下說入是從道之全量說入孝  
此曰天之經地之義民之行是從孝之本量說  
入先王至德要道以順天下之由也

夫孝二字提起卽前所言之孝不僅指五孝凡  
夫子所言者均在內故夫子說到順天下而朱  
子亦以此章爲順天下之傳也孝能順天下卽  
孝之大處曾子歎其大處在是故夫子答之亦  
以是惟爲天之經地之義民之行所以順天下  
而人不能違也

天之經以天生物之理言主知一邊說乾以易  
知也而知莫先於知愛親地之義以人事之宜  
言主行一邊說坤以簡能也而行莫切於能敬

親天與人以必應有之理卽人在地上必應爲  
之事自昧其愛敬之理知能之事則去此幾希  
入於禽獸而非人禽獸知覺運動均無異於人  
惟愛敬之知能絕不與人同故孝曰天經地義  
而爲民之行也

此愛敬知能是天地生人人人必有之理無一  
人不然故以之順天下講明其理爲教人不能  
自欺其心謂孝之理非己心所固有推行其事  
爲政人不能自謝其責謂孝之事非己職所當



爲故教不肅而成而政不嚴而治也

天之經三句猶言滿天地間均是此孝之理所  
充塞舍此更無他事竟其事者古今惟堯舜禹  
湯文武周公深明其理以傳爲學者則爲孔子  
此書顏曾游夏蓋皆聞之而孟子七篇議論無  
出此外者其陳王道處無不歸本孝弟而於孔  
子之論無一不合凡所謂保民而王同民憂樂  
同民好惡以善養人得乎邱民皆孔子順天下  
下之旨也

天之經是人心固有之德地之義是人生日用之禮孔子道之以德齊之以禮卽是以政教順天下有恥且格卽教不肅而成政不嚴而治也感發其固有之良不以刑威迫於其後何嚴肅之有德禮並言則異散文則同德者禮之本禮者德之文也故天經地義民行夫子以之爲孝而子太叔以之論禮以德順天下樂天者也以禮順天下畏天者也樂則愛之意多故曰天子必有父以愛親之仁

仁天下也畏則敬之意多故曰諸侯必有兄  
以敬兄之義義天下也然則天子諸侯之分其  
亦分於出治之源乎

政如是教亦如是直指本心是從愛親最初之  
念入手其說多直截徑易如孟子論王政以不  
忍人之心爲本論學曰求放心曰無欲其所不  
欲無爲其所不爲是也重視學修是從敬親繼  
起之文入手其說必委曲詳明如荀子陳王道  
詳於禮法而論學認性爲惡重人爲是也再降

則禮變爲刑法而政爲霸術教爲異端矣

先王見教之可以化民也是故先之以博愛而民莫遺其親陳之於德義而民興行先之以敬讓而民不爭導之以禮樂而民和睦示之以好惡而民知禁詩云赫赫師尹民具爾瞻

此十四句朱子刊誤本所無此章標爲三才章自夫孝天之經至其政不嚴而治文氣已足故朱子刊去此十一句與然政教以導民行此十一句仍政教分承卽是以順天下之法朱子以

此章爲順天下之傳似有此十四句爲長

先王見教之可以化民也教字溫公改作孝惟欲化民方始爲教教可以化民夫豈待言此因孝爲天經地義順而播之天下爲政爲教民自興行爲詳其順而播孝爲政教之法故曰先王見孝之可以化民也

孝可化民卽孝弟不犯上作亂爲仁之本之意孟子所謂親親仁也敬長義也達之天下卽孝可以化民也

先之以博愛謂推愛親之心不敢惡於人也立  
愛自親始故民莫遺其親博愛以心言故陳古  
人德義之迹使人有所觀感持循自奮於孝愛  
故民興行此提醒其固有之良心以孝爲教之  
始也

先之以敬讓謂推敬親之行不敢慢於人也立  
敬自長始犯上作亂皆爭也故敬之實爲讓上  
先敬讓此理爲人人心中所固有故民不爭也  
敬讓則實見爲行故必定爲法度以範其迹達

爲聲容以暢其神鼓舞其善心防閑其邪志則  
禮樂刑政備矣禮樂刑政備以孝爲教之全規  
也

先之以博愛有關雝麟趾之意也先之以敬讓  
行周官之法度也人心只此愛敬之良達之天  
下千枝萬葉不能越此兩端故愛敬足括王道  
之全也

愛敬分言一仁一義對峙而立並行不悖故以  
兩先之對說若合說則愛是敬之體敬是愛之

用欲使此愛博而無所不周須從敬讓做起而  
禮樂刑政無一可闕愛而不敬則姑息爲仁蕩  
無法紀流爲黃老終亦不能自達其愛矣故先  
之以博愛敬讓端政教之本也陳之於德義以古人  
政教之迹示之也導之以禮樂示之以好惡則  
立法以順天下使愛博而相敬讓也故文法兩  
對而理實一貫弟亦孝也

孝爲民之行謂之爲民則屈伏於下以待有政  
教者之鼓舞化導故引詩以明順天下之責在



上不在民也師爲教者也尹正也正人之不正  
爲政者也赫赫注訓明盛貌政教明盛之貌也  
爾有政教之責者在古卽先王也瞻者瞻其有  
至德要道與否也瞻其先之陳之導之示之則  
有至德要道以順民心政教自形赫赫之勢民  
莫敢遺親而皆興行不爭和睦知禁天下之民  
胥奉承天經率由地義而世大治矣此順天下  
之實象也古人引詩多斷章取義不必拘周太  
師尹氏之故訓也

孝治章第八

此章是以孝順天下之效故曰孝治據天下已治言之朱子所以謂爲釋民用和睦上下無怨之意也天經地義至其政不嚴而治是孝治之所從出先王見孝之可以化民也以下十一句是以孝治之法此章則其效也故以上下文推之先王見孝之可以化民也十一句決不可去去則先王以孝治天下之作用次第隱矣

子曰昔者明王之以孝治天下也不敢遺小國之臣而況於公侯伯子男乎故得萬國之歡心以事其先王治國者不敢侮於鰥寡而況於士民乎故得百姓之歡心以事其先君治家者不敢失於臣

妾而況於妻子乎故得人之懽心以事其親夫然  
故生則親安之祭則鬼享之是以天下和平災害  
不生禍亂不作故明王之以孝治天下也如此詩  
云有覺德行四國順之

前俱言先王此忽易爲明王前言其理此舉其  
效能奏孝治之績者貴能擇術知孝可以化民  
而果得人人之懽此先生之明也堯舜之智不  
徧物先務之爲急先務者何養吾愛敬之源不  
敢遺悔有所失而已

此經謂治天下爲順天下順者不以威力把持而順人人之心以爲治所謂王道也推吾心之愛敬順而布之天下禮樂刑政皆從此出得乎人心之所同然故無人不懽悅所謂王者之民皞皞如也若恃威權以力服人所行之政不必不善擇術不純一切禁令不能盡出於大公無我之心霸者之政不久卽弊者此也

以明王提起而中及有國有家者天子必有父治天下必自齊家始也然則比以孝治所及之

大小言非拘於天子諸侯卿大夫士之位則舉五孝統言之也舉五孝統言之不及庶人者庶人未嘗無妻子不敢失於妻子足以該之矣敬愛之謂也

治天下言事先王有國言事先君有家則曰事其親聖人生封建之世有天下與國皆親沒而繼其位也然則天子之先王必上推及感生之帝方有不敢遺小國之臣之誠天子保四海諸侯保社稷以孝保之不敢遺不敢侮之義也事

先王先君孝也得萬國百姓之懽心弟也孝直而弟橫孝直進高一步弟橫進廣一步孝以弟行也若有家則苟爲成人卽有家矣臣妾妻子生而自具不必父母沒始有之故不與上文一例曰事先人而曰事其親也

我所役使之  
人卽爲臣妾得萬

國百姓之懽心先王先君則享之然先王先君往矣享不享不可得而見也惟親在而驗之家則兄弟妻孥勃谿詭譎家庭成何景象雖日供鼎鐘之養父母能下咽乎生而見之憂不能食

死而有知不享其祭也明矣況失萬國百姓之心則災害生而禍亂作必喪其天下與國乎故以生則親安言於前以實例虛欲人之易曉也明王之以孝治天下如此如此指孝治和平之象後人心慕而力追之也結上文卽以悚動讀之者以孝順天下之意已足卽以起下文曾子之問也

引大雅之詩注訓覺爲大然此有明意卽上章知孝可以化民之知此章明王之明也先王知

孝可以順天下而實得之於心爲德體之於身  
爲行四國皆有懽心則孝道大明於天下而天  
下大順也明之中有大義不知道則狹隘治不  
能同天下則非大也故曰有覺德行四國順之

### 聖治章第九

聖治卽孝治也聖人治天下其所本者孝  
故曰孝治以孝治天下而天下果治非聖  
人不能故  
曰聖治

曾子曰敢問聖人之德無以加於孝乎子曰天地  
之性人爲貴人之行莫大於孝孝莫大於嚴父嚴



父莫大於配天則周公其人也昔者周公郊祀后稷以配天宗祀文王於明堂以配上帝是以四海之內各以其職來祭夫聖人之德又何以加於孝乎故親生之膝下以養父母日嚴聖人因嚴以教敬因親以教愛聖人之教不肅而成其政不嚴而治其所因者本也父子之道天性也君臣之義也父母生之續莫大焉君親臨之厚莫重焉故不愛其親而愛他人者謂之悖德不敬其親而敬他人者謂之悖禮以順則逆民無則焉不在於善而皆

在於凶德雖得之君子不貴也君子則不然言思  
可道行思可樂德義可尊作事可法容止可觀進  
退可度以臨其民是以其民畏而愛之則而象之  
故能成其德教而行其政令詩云淑人君子其儀  
不忒

三才章言以孝治天下之原及其施行次第孝  
治章言以孝治天下之效孝爲人之常行而以  
天下爲量是千古聖人德配天地者僅完其爲  
子之常行故曾子疑而問之夫子爲推治之始

終胥本天德而孝足以達之則聖人之德固無以加於孝也

此章夫子語亦分兩節前言聖人以孝治者本乎天是聖人以天統人也後言聖人以孝治者因乎人是聖人以人合天也天人一貫是此章大旨故起以天地之性人爲貴天人並提結以其所因者本也本以結前半因以結後半天地之性人爲貴此聖人治天下之本天下雖大不過人與人相積耳天生萬物以充於天地

閒而皆爲人用卽其裁成之理悉備於人故人  
能裁成萬物其性靈於物人所以貴於物也孟  
子謂人之異於禽獸者幾希卽指此性此性字  
卽仁義禮智信五常之性疏乃訓爲生失之矣  
人有此性生而自具之理也然人初生與禽獸無  
異或反不如禽獸禽獸生而自就乳哺而人不  
能也禽獸生而自能行走而人不能也禽獸之  
材能限於其形而人不如是也禽獸之聲音拘  
於其始而人不如是也故人性之貴觀於初生

猶不可見見之於其行行者人情之作用精言之則學也故人之貴於物也在能學之性學非求益於外也所以養其固有之性使小者大粗者精淺者深近者遠也其端則莫先於孝蓋人生不能不與人物接其最先接者則其父母稍有知識卽愛其親愛情也實發於性中之仁人與人積以成天下維此愛之情足以相結而不敝聖人之德莫大於仁愛親之孝行仁之始也而可以該終身之行故曰人之行莫大於孝也

知愛親必有以將其愛其迹爲養以養將其愛  
所以使親心安而神悅也愛必親之心安神悅  
乃可謂之孝則由愛生敬而養志之道急矣父  
主一家兄弟詬誶父不安也父主一國國人愁  
苦父不安也父主天下天下困窮父不安也蓋  
吾生而自具之性原與天地萬物爲一體父受  
之於天以授吾身吾不能盡性以達天德則與  
全受全歸之義有所虧養口體而不能養志世  
俗之孝非學人之事也

敬父不能敬兄弟故長而敬兄由嚴父而推也  
不敢遺小國之臣不敢侮於鰥寡不敢失於臣  
妾則敬天下之人皆如兄弟矣天下人皆天所  
生吾父生吾而天下人皆如吾兄弟則天下人  
皆如吾父之子矣非配天而何天下人皆如兄  
弟不遺不侮不失愛之謂也天下人非如兄弟  
而視如兄弟則有察識推度擴充之事焉得其  
理之所以然而必赴之不敢遺不敢侮不敢失  
敬之謂也嚴父莫大於配天不至於配天不能

孝經本義  
三  
滿嚴敬其父之量以德言非以位言也

古聖人盡孝之德皆足以配天理本如是非必  
位爲天子始云嚴父配天也然配天之實非舉  
事以證之則其理不顯故舉周公以證之不曰  
其人則周公而曰周公其人也此論創發於夫  
子於羣聖之中選及周公而謂足以當之爲理  
求其人非因人得其理也以其形體言謂之天  
渾舉之名也以其主宰言謂之上帝專指之詞  
也天無爲而上帝若有靈響故后稷配天而文



王配上帝也天與人以性而人不能自遂其性  
周公繼父之志以爲之遂天下遂其性者若文  
王爲之遂之也感戴文王烏能不同於上帝不  
於郊宗之禮則人心感戴之誠無從見至四海  
之內各以其職來助祭則人人慊心事周公之  
祖父如事天而聖人之達天德無加於孝可以  
恍然明矣

聖人之德無以加於孝以天下之大無一人不  
該於孝字中也夫聖人之以孝治天下非強天

下人使就吾治也。因人人之性以爲政，教使自  
遂其性也。人之生也，當孩提之時，親愛其親之  
心，卽於是生由是漸知。修子之職以養父母而  
性德與之俱長，則由愛以生敬，由養口體以養  
志，養口體服勞奉養以形體事親愛之事也。養  
志修身行道以學問事親敬之事也。而皆爲人  
人性分所固有。故聖人因其固有之敬，播爲秩  
序之禮，使人人由之以爲政。因其固有之愛，導  
以祥和之仁，使人人就之以爲教。因人心之本

然順而導之故教不肅而成政不嚴而治也聖人之德無以加於孝天下之事無一能外於孝也

以上古文分爲一章朱子謂爲釋孝德之本之意以下語意更端當別爲一章案此章語意精粹似合三才孝治兩章而通論之不僅釋孝德之本之意也

此下以至謂之悖禮朱子從古文別爲一章而刪去以順則逆至引詩共十九句定爲傳之六

章釋教之所由生之意而謂君臣之義之下有  
脫簡案朱子謂此下爲釋教之所由生所見甚  
當然謂父子之道天性也爲語意更端則此下  
仍反覆推明因嚴以敬敬因親以敬愛之義而  
語意重因嚴父以敬敬一邊有父子然後有君  
臣上下禮義有所措蓋由天經地義以至治天  
下卽是由性而爲教由性而爲教則以敬將其  
愛父子天性之愛易見而由愛生敬理不易明  
故此下反覆推明之上文因嚴敬卽父母生

之膝下以養父母日嚴之義舉天地閒事胥納  
之於孝非達於君臣之義不能以敬將其愛也  
父子之道天性也父子之閒以愛相接此爲天  
性不待學而能也然知愛而不知敬夫子謂爲  
犬馬之養恃性而不學卽不能自別於禽獸人  
性之貴固以能學爲貴也故人之愛親之迹皆  
從敬上見愛以敬將之卽仁以義行忠以恕見  
之理故曰父子之道天性也率性之謂道也道  
必修爲而後顯則一切禮樂刑政具焉而君臣

之義起矣所謂修道之謂教也

父母生之續莫大焉父母生我之身卽與我以  
性性中萬理皆備在我繼續以成其性生而與  
我以萬物之理乾道資始也我不繼續以成終  
虧體辱親矣故曰續莫大焉續者緝熙敬止之  
謂也

天性之愛必續以日嚴之敬則親之臨我如君  
焉知愛而敬之必不敢慢其兄弟由是而祖宗  
而天則大君爲宗子而民物爲吾一家人也是

君之尊臨我卽父母之親臨我也以天性之愛  
與天下相接必自親愛其君始嚴父配天則能  
親愛其君矣故曰厚莫重焉事父從愛說到敬  
續卽敬焉事君從敬說到愛厚卽愛也

故順天下之道不從孝做起卽謂之悖愛由天  
性之良故曰德敬爲人事之宜故曰禮不愛敬  
其親而愛敬他人立愛不自親始立敬不自長  
始未達於天命之原而泛言兼愛也故以之順  
天下而已則先逆也已旣先逆民何所則窒愛

敬之原而欲天下終無悖逆凶德必無之事也  
然當悖亂之世有人焉獨持愛敬之說以與天  
下相接天下或翕然向之君子不貴者無源之  
水必竭無根之木必枯故君子貴務本也

務本者守吾父母全受之身而已矣吾出而與  
天下接上敬吾君下愛吾民非舍父母不愛敬  
而愛敬吾君與民也實體吾性之德備爲吾身之  
禮使言可行道可樂則德義可尊作事可法容  
止可觀進退可度出而任天下事事君以禮而



導民以德民無不畏而愛之則而象之政令行而德教成矣

淑人君子其儀不忒身無悖逆之儀天下順之矣故曰孝始於事親中於事君終於立身始於事親愛敬所起之端也中於事君愛敬所著之迹也終於立身愛敬之性吾身受之父母全受全歸之義也彼摩頂放踵以爲兼愛者昧立愛之始終烏能善其後哉

紀孝行章第十

子曰孝子之事親也居則致其敬養則致其樂病則致其憂喪則致其哀祭則致其嚴五者備矣然後能事親事親者居上不驕爲下不亂在醜不爭居上而驕則亡爲下而亂則刑在醜而爭則兵三者不除雖日用三牲之養猶爲不孝也

朱子以此爲傳之七章釋始於事親及不敢毀傷之意案開宗明義至五孝章明孝之全量能該天下之人三才章挾孝之源孝治章推孝之用聖治章言孝之成功皆就孝字大處說此章

始言人子事親之細目蓋孝能統天下之人而  
人人體之於身其節目則如是也

居則致其敬無一時一事敢忘父母修身行道  
養志之事養則致其樂得人之懽心以事父母  
服勞奉養養口體之事此二者爲常時之孝病  
致其憂喪致其哀變時之孝祭致其嚴則終身  
之孝也此五者以愛爲體以敬爲用居則致其  
敬能該養病喪祭之樂憂哀嚴而處世亦在其  
中故居上不驕爲下不亂在醜不爭皆是敬以

持身之孝而亡刑兵之禍可免身體髮膚不敢  
毀傷敬以持身之謂曾子啓手足引詩戰兢數  
語卽居則致其敬以終身也

孝以愛爲體以敬爲用居則致其敬一語能該  
全章人子盡孝於親舍敬無從致力敬不在事  
親之儀文而在守身之嚴密存心之純篤愛之  
原是仁敬之迹是禮夫子告顏子以戒視聽言  
動之非禮爲爲仁之目卽敬以將其愛孟子不  
失其身乃能事親之義也故游夏聖門高弟夫

子與之論孝均無滿詞子游學偏存心略於敬之迹子夏學主守身昧於敬之原居則致其敬內外交修之詣也方可謂之致雖日用三牲之養猶爲不孝失其身不能事親也故養可能也敬爲難敬者敬身之謂也於服勞奉養求敬末矣

五刑章第十一

子曰五刑之屬三千而罪莫大於不孝要君者無上非聖人者無法非孝者無親此大亂之道也

此章與前章反對禮爲敬之迹出乎禮則入乎刑孝爲教之所由生刑以弼教故此章繼孝行章之後兩章如一章也

兵刑之世卽是亂世亂之大者卽亡次則兵次則刑上章先言居上次爲下次在醜在醜與平等接也孝以天下爲量欲孝及天下必先事君尊先王之法而推行本心之愛故五刑之屬三千而罪莫大於不孝而敍要君非聖於前孝之大用在事君以順天下方爲成身不敬君事而

背聖人之法以與眾相爭則天下大亂矣何從  
言孝非孝者無親卽在醜而爭也君以政令平  
天下之爭者也聖以學問息天下之爭者也孝  
則政令之所從生也昧孝所從出之源不能嚴  
父配天故不以宗子尊大君而以仕進爲祿利  
之途不以道德爲性分而以詩書爲干進之具  
故詭遇求合卽是要君藻飾文采卽爲非聖雖  
貌爲純謹之容而內無愛敬之誠人孰親之孝  
爲順天下之道天下順則敬讓相愛而不爭禮

之所謂齊也不順則悖逆爭奪而亂兵刑不於是作乎非孝者所行無愛敬之誠體於中立朝則泄泄沓沓居鄉則同流合污有嗜欲而無血性古今天下之亂皆此等人爲之也孝者人之良知良能卽眞性情也

廣要道章第十二

子曰教民親愛莫善於孝教民禮順莫善於悌移風易俗莫善於樂安上治民莫善於禮禮者敬而已矣故敬其父則子悅敬其兄則弟悅敬其君則



臣悅敬一人而千萬人悅所敬者寡而悅者眾此之謂要道也

朱子以此爲傳之一章而移至德章於首蓋順開宗明義章夫子之語至德在要道之前按此經爲順天下而作以孝順天下其用全在悌孝主於愛其達於政爲仁悌主於敬其達於政爲禮順天下仁不可見可見者爲禮由禮而見其仁則順天下之明效大驗故先要道於至德也

要道章孝悌禮樂並言而歸重於禮之敬治天下之大經大法無一非禮也論語八佾篇言禮先於里仁篇之言仁亦是此意

孝是良知弟是良能能卽主行一邊猶言於事上見孝則惟見敬兄之悌而已故孝之理直上直下至於父天母地則悌之事橫推橫行至於民胞物與直上直下真有父母天地之心何從見之亦見其所行之事有民胞物與之實而已故此章於孝愛悌順禮敬樂和中特抽出禮之

敬而申言之見順天下之道實是悌也故敬其  
父則子悅以下又明以悌順天下之要此章是  
行順天下之道故曰廣要道也

廣至德章第十三

子曰君子之教以孝也非家至而日見之也教以  
孝所以敬天下之爲人父者也教以悌所以敬天  
下之爲人兄者也教以臣所以敬天下之爲人君  
者也詩云愷悌君子民之父母非至德其孰能順  
民如此其大者乎

此章仍承上章敬字而謂爲至德者播此德以  
順天下謂之道天下皆由此道而順謂之德人  
人皆敬父兄與君所謂無犯上作亂之事之人  
太平之象也言兄者由父至君之階級亦以孝  
順天下之實迹也

教以孝教以悌教以臣旣非家到戶至日見而  
語之將何以爲教蓋制爲父子兄弟君臣上下  
之禮布之天下使人遵守之所謂一代之制度  
也自古至今中國外夷必有父子兄弟君臣上

下之禮方能成國方能相安無事近以中國純  
上虛文不修實政致令貧弱見侮於人遂欲舉  
父子君臣長幼之禮而廢之而一以平等嗚呼  
慎矣

引詩愷悌樂易固爲本義然人與天下接平等  
皆悌也父子主愛君臣主敬兄弟則愛敬兼之  
此所謂愷悌固兼舉愛敬而取其中卽胞與之  
仁退讓之禮也故爲至德順天下如此其大也

廣揚名章第十四

子曰君子之事親孝故忠可移於君事兄悌故順可移於長居家理故治可移於官是以行成於內而名立於後世矣

朱子以此爲十一章釋立身揚名及士之孝次於感應章後以感應章爲釋天子之孝也按廣要道章言順天下在禮之敬是悌爲要道順天下之具也廣至德章言以悌順天下而天下無不順是孝爲悌之源盡悌卽以盡孝孝爲至德人人皆有順天下之本也由要道以成至德其

設施之方不過擴充此心以加諸彼而已卽此章移之之義故此章爲以至德要道順天下之機緘大學治國章孝者所以事君與此文義胥同孟子論仁政均本於此今文題爲廣場名朱子定爲釋立身揚名皆因名立於後世一語而題之非此章之要也

居家理謂一家之人各治其生業勤其職分父子子子兄兄弟弟夫夫婦婦而家齊也家與家積而爲邑官所治之事千萬人之家事也故居

家理治即可移於官也

古文有閨門章子曰閨門之內具禮矣乎嚴父  
嚴兄妻子臣妾猶百姓徒役也朱子以爲此章  
之繼而釋之曰因上章三可移而言嚴父孝也  
嚴兄悌也妻子臣妾官也接此篇屢言父兄未  
言及家眾此言妻子臣妾爲補齊一家所有之  
人是於孝悌外補出慈眾爲居家理治可移於  
官句中應有之義朱子移使相繼所見當矣惟  
本文以妻子臣妾爲猶百姓徒役而釋爲官非



也

禮爲治天下之大經大法卽是人與人相接之道孝上交也悌平等相接也慈下交也有此三等接天下之人不外是矣故曰閨門之內具禮矣乎謂卽家而治國平天下之大經大法悉備也

諫諍章第十五

曾子曰若夫慈愛恭敬安親揚名則聞命矣敢問子從父之令可謂孝乎子曰是何言與是何言與

昔者天子有爭臣七人雖無道不失其天下諸侯  
有爭臣五人雖無道不失其國大夫有爭臣三人  
雖無道不失其家士有爭友則身不離於令名父  
有爭子則身不陷於不義故當不義則子不可以  
不爭於父臣不可以不爭於君故當不義則爭之  
從父之令又焉得爲孝乎

此章朱子定爲十二章在廣揚名後喪親章前釋  
爲不解經而別發一義今文則因曾子之問有  
揚名語故次之於此不如朱子所次之善

父子之間不責善事親有隱無犯孝爲順德故  
曾子問從親之令可以爲孝而夫子大不然之  
蓋父爲人子所天而究人也天命之理無不善  
也雜以人爲則不必胥合天則焉故有善有不  
善以不善令其子則亂命也子不諫而從之從  
父之亂命必違天之治命是以父命違大父命  
也傳曰以王父命違父命不以父命違王父命  
此人子事親之定則也從親之令不可爲孝則  
事親之際念念胥奉天則是以天尊其親也嚴

父配天之義莫大於是莫切於是如是然後天下無不是底父母然後天下之爲父子者定以父統子仍以天統人也

天子諸侯以及士而繼以父有諍子此父字卽是庶人謂自天子以至庶人皆賴諫諍以免於不義臣友且不忍坐視君友之不義而況父子之親乎然則事親有隱無犯隱隱諫不顯諫也卽論語之幾諫視於無形聽於無聲見幾最早而慮患獨深故諫愈隱而心愈苦不如是則臣

友之疏非父子之親也

感應章第十六

子曰昔者明王事父孝故事天明事母孝故事地  
察長幼順故上下治天地明察神明彰矣故雖天  
子必有尊也言有父也必有先也言有兄也宗廟  
致敬不忘親也修身慎行恐辱先也宗廟致敬鬼  
神著矣孝悌之至通於神明光於四海無所不通  
詩云自西自東自南自北無思不服

朱子以此爲十章在事君章後廣揚名章前爲

釋天子之孝按此章似爲至德要道順天下之  
總結民用和睦上下無怨非有以洽於神明之  
地不足以致此以孝順天下天地且爲明察何  
況於人東西南北無思不服思卽神明之地服  
卽順也此順天下而天下順之之實也

事父事母之孝有何分別而此以天地分配且  
別有明察父母之事果分兩事乎此蓋以明王  
治天下之迹言之而分屬之父母也凡明王所  
以理人性情者爲教之理理原於心性乾父所  
以資始也明王所以給人身家者爲養之事事

成於氣體坤母所以資生也教之理精微闡性  
分所固有故曰事天明明者無幽不燭也養之  
事繁碎盡職分所當爲故曰事地察察者雖小  
不遺也事父母之孝不必有異特以分配天地  
異之也

事父母之孝分配天地復言長幼順者順卽事  
兄之悌此章暗承三才章事天明卽是則天之  
明事地察卽是因地之利察而因之也至於長  
幼順上下治卽是民之行三才章以順天下承

民之行此章變民之行爲長幼順事兄與使眾  
不合故變文言之也夫人與人接之謂道民之  
行以長幼順該之可見明王以孝治天下以悌  
治之也

天地明察者天壤之間教之理無不明養之事  
無不治也天清地寧倫理攸敍天子必有尊等  
句言長幼順之所自始卽順天下之所自始也  
修身慎行所以順之端宗廟致敬嚴父配天之  
義又隱寓焉謂曰天子卽是以天爲父宗廟之



中必及始祖始祖之所自出則天也通篇之精義此章皆及之故此章爲總結通篇也

事君章第十七

子曰君子之事上也進思盡忠退思補過將順其美匡救其惡故上下能相親也詩云心乎愛矣遐不謂矣中心藏之何日忘之

朱子以此爲傳之九章移於五刑章後謂釋中於事君之意按感應章卽已總結此復言事君者通於神明之治非聖人在天子之位不可夫

子身當繼世有天下之運知自此以後不能常  
遇明王不能不重其責於臣則以孝順天下人  
人有其責焉故於感應章後繼以事君而以盡  
忠補過順美救惡爲言皆輔成君德之術孝經  
之作爲萬世之天下慮也

親愛其人莫若輔成其德孟子以責難陳善閉  
邪爲敬恭此以將順匡救爲親愛親愛孝也敬  
恭悌也非孝不能爲悌故孟子之敬恭言其用  
此之親愛挾其源也朱子移諫諍章於此章後

謂不解經別發一義按移孝作忠移其愛親之心以愛君謂可以達吾孝之實以及天下也移之之本卽有責難之義而或父子之親愛無責難今觀嚴父亦貴有諍子則臣之敬共其君而匡救者爲親愛也明矣

喪親章第十八

子曰孝子之喪親也哭不偯禮無容言不文服美不安聞樂不樂食旨不甘此哀戚之情也三日而食教民無以死傷生毀不滅性此聖人之政也喪

不過三年示民有終也爲之棺槨衣衾而舉之陳其簠簋而哀感之擗踊哭泣哀以送之卜其宅兆而安厝之爲之宗廟以鬼享之春秋祭祀以時思之生事愛敬死事哀戚生民之本盡矣死生之義備矣孝子之事親終矣

前以立身行道揚名於後世爲孝之終此章以喪親爲孝之終蓋孝子能延親之名不能延親之身故孝子之孝思無窮而親身不能無終也

揚名養志之孝也喪親養口體之孝也養志無  
終時所謂終於立身終孝子之身非終父母之  
身也終而曰立身則雖孝子之身終仍常立於  
天壤在人心目中永永不忘故曰孝子不匱也  
若口體之養則百年爲期自此以後無從致養  
故養口體之事此篇不一及而此章喪親始及  
棺槨衣衾簋簠宅兆宗廟則生事之飲食衣服  
居處必竭心力以致其愛敬可知也此以喪親  
終朱子謂不解經而別發一義蓋補出養口體

之孝則此經精粗備舉而無遺義也

孔子不以服勞奉養爲孝孟子謂養口體爲世俗之孝曾子以養爲下此篇養字三見一謹身節用以養父母在庶人章庶人卽世俗之人也一爲父母生之膝下以養父母日嚴則養爲孩提後之孝日嚴乃成人之孝也惟養則致其樂與居則致其敬等句並列則養志必不廢口體之養然則輕重固顯然不可誣矣乃自漢以來史志所稱爲孝者無一非服勞奉養之末而所

謂至德要道者則無人及焉吾教之異於無父  
無君者在以孝爲一貫之道親親而仁民仁民  
而愛物內外一致始終備舉今乃泥其粗以遺  
其精執其一而昧其貫二千餘年訾人之爲楊  
爲墨而不知孝悌而昧君臣之義王祥馮道之  
孝也仕進而絕父母之恩溫嶠之忠也則吾卽  
以楊而訾墨以墨而訾楊甚且不如爲我之高  
潔兼愛之公溥貪利干進以營其私大道沈晦  
世教凌夷貧弱遂爲五大洲冠而猶自謂中國

聖人孔子之道嗚呼孔子之道卽爲孝悌今孝  
經具在其所謂孝者果何如也

孝經本義終